

妙法蓮華經  
如来神力品第二十一

諸仏救世者 住於大神通  
為悦衆生故 現無量神力  
舌相至梵天 身放無數光  
為求仏道者 現此希有事  
諸仏警歎声 及彈指之声  
周聞十方国 地皆六種動  
以仏滅度後 能持是經故  
諸仏皆歡喜 現無量神力  
囑累是經故 讚美受持者  
於無量劫中 猶故不能尽  
是人之功徳 無辺無有窮  
如十方虚空 不可得辺際  
能持是經者 則為已見我  
亦見多宝仏 及諸分身者  
又見我今日 教化諸菩薩

能持是經者 令我及分身  
滅度多宝仏 一切皆歡喜  
十方現在仏 并過去未來  
亦見亦供養 亦令得歡喜  
諸仏坐道場 所得秘要法  
能持是經者 不久亦當得  
能持是經者 於諸法之義  
名字及言辞 樂説無窮尽  
如風於空中 一切無障礙  
於如来滅後 知仏所説經  
因縁及次第 隨義如実説  
如日月光明 能除諸幽冥  
斯人行世間 能滅衆生闇  
教無量菩薩 畢竟住一乘  
是故有智者 聞此功徳利  
於我滅度後 応受持斯經  
是人於仏道 決定無有疑